


KE A TSEBA MOLOPOLLI

O A K A O A PHELA

 . . .matsatsi ohle a phomolo, lena ke lona letsatsi, lehla la tsoho. Ho phutheha 'moho ka pelō e thabileng, hobane O a phela. 'Me O boletse, “Erekaha Ke phela, le lōna le phela ke hona.” 'Me ke tšepo e kakang eo, re ka phomolang holim'a eona, hoseng hona.

² Joale pejana feela re fumana Molaetsa oa hoseng, ha re inamiseng lihlooho tsa rōna, pejana hanyenyane feela, bakeng sa thapelo.

³ Molimo o ratehang, re motlotlo hoseng hona, ho ba batho ba bitsoang ka Lebitso la Hao. Re thabile ha re sa tlameha ho e hakanya feela, hape, ka tsoho e khōlō e tlang ho tla; hobane e fetohile bonnete ho rōna, joalokaha re e bala Lentsoeng la Hao, le ho bona hobane U tšepisitse sena, 'me re e utloile meeng ea rōna, hore Jesu o a phela . . . [Sekheo lebanteng—Mohl.]

⁴ Oh, re ka nahana, hoseng hona, ka mahlomolalipelō a mangata a hlahlileng bophelong, le litšarelo tse ngata tseo re li fetileng, le maiphihlelo a re qhaqhileng, a re lahlela meeng ea lefatše. Kamoo re patileng baratuo a ba rōna, 'me ra hlomōha lebitleng. 'Me meea ea rōna—ea rōna ea ka e tla timela ka ho rōna. Empa, hape, re ka nahana ka kajeno, oh, se boleloang ke ha Jesu a tsohile bafung! O falalitse matla a mang le a mang a sera, mohla A neng a tsoha, ka tlhoho. O tloisitse meriti eohle. Joale re tsamaea leseling le theko e thata la tsoho ea Hae.

⁵ Oh, ha re nahana, lilemo tse batlileng ho ba sekete le makholo a robong tse fetileng, kapa ho feta, hoseng hona, mohla basajana ba babeli ba nyolohang ka tsela ba habile lebitla, ba ipotsa ea tla phikolosa lejoe. Empa Molimo o se o le phikolositse. 'Me Ea kileng a lula litlamong, o ne a tsohile bafung 'me a buisana le bona. Le ho re, “E-eang, le bolelle barutuo a ba Ka, le Petrose, hore Ke tla kōpana le bona koana Galelea.”

⁶ Oh, re U leboha hakakang ka boiphihlelo bo boholo bona, ha re sa ntse re ka paka tsoho eo, 'me e fetoha 'nete feela ho rōna joaloka ho bona hoseng hoo, hobane O tsohile bafung.

⁷ Re tšoarele libe tsa rōna le likhaello tsa rōna, sohle seo re se entseng kapa re se buileng, kapa esita le ho se nahana, se neng se le phoso, Morena. Re a rapela U tle u re tšoarele lintho tsena. Le ho re tiisa, ka botebo. Atamela haufi, hoseng hona. Oh, ke khafetsa U eme meriting, mohla mathata a rōna a tebileng hakana.

8 Maria a khutla lebitleng hoseng hoo, a ntse a lla, o utloile Puo ka morao ho eèna, e itseng, “U ntse u llela’ng?” O ne a eme kamorao ho eèna feela, a shebile feela se neng se etsahala. ’Me eitseha A bitsa lebitso la hae, pelō ea hae e tsoanetse e be e ile ea tloaka ke thabo, hobane Morena oa hae o ne a tsohile bafung.

9 Oh, bua le rōna hoseng hona, Morena. Re fe Lentsoe la Hao le Moea oa Hao. Le ho re kholisa, bocha, hoseng hona, re sa bua ka baporofeta le ka ba fapaneng ba kileng ba lebella nako e khōlo ena.

10 ’Me re emetse tsoho ea bohle matsatsing a qetelo, mohla Morena oa rōna a tlang ho boela a khutla. Ho fihlela mohlang oo, Morena, re baballe re koenne ’meleng, re thabile, re tletse thabo, re nyakaletse. ’Me re sa phele ka bohobe feela, empa ka Lentsoe le leng le le leng le tsoang molomong oa Molimo, re mpe re iphelise ka hoo. Re abele sena, Ntate, hoba re se kōpa ka Lebitso la Hae, Ea tsohileng bafung ’me a fana ka tiisetso ea tsoho ea rōna. Amen.

11 Ha ke theoha ka tsela nakoana e fetileng, ke ne ke nahanne, ha linonyana li ntse li bina, seo sehla sa selemo se leng sona kajeno! Ka morao... Paseka e tsoaneleha hakakang! Hoba mariha a maholo a lefifi le a batang a fete, le lifefo tsohle tsa ona le lintho, mahlaseli a letsatsi a phunyeletsa a chaba. ’Me ho fihla ha letsatsi ho tlisa bophelo bo bocha, tšepo e ncha, lihla tse ncha, lijalo tse ncha, lipalesa tse ncha. Ntho e ’ngoe le e ’ngoe e a phela. Kamoo motho, esitile le mohla a sa tsoarang Bibeletso eo a e balang, koana o be a ka tseba hobane Molimo o teng. Ka ho shalima tlhaho feela, kamoo e suthang ’me e boela e khutla; mariha a selemo ke thakhiso; sehla sa selemo ke tsoho; ’me e bona Molimo feela nthong e ’ngoe le e ’ngoe.

12 ’Me ke ne ke nahanne, ha ke mametse meloli ea linonyana tsa ka, kantle jareteng hoseng hona, bomaborokoane ba ka, ke ba rata feela. Ke ba bitsa liea-le-moea tsa ka tse nyenyane. ’Me ke tsoela kantle ’me ke bulela seea-le-moea sa ka, hoseng, ke a se mamela.

13 ’Me, joale, le tseba tšomonyana ea maborokoane. E ne e le nonyana e sootho, ha tšomo e bolela, ho fihlela ka Labohlano le Molemo. ’Me e Mong o ne a shoa, a le mong, ’me A sa thusoe ke mang. ’Me A ema a le mong. ’Me A khokhothetsoe, le hona sefapanong. ’Me nonyana e nyenyane e sootho ea leka ho Mo lokolla sefapanong. ’Me ha e ntse e rutlolohela morao le pele, e kobola lithakhisa, le meutloa e hloohong ea Hae, ea neta sefuba sa eona sohle se se nyenyane sa tlerefala ke mali, ’me esale se le sefubelu ho tloha mohlang oo.

Eaba ke a nahana, “Oho Molimo, ke batla thebe ea mofuta oo.”

14 'Me ha u ka shebella maborokoane ha a intlafatsa. Ka tlasana ho kojoana e khubelu eo ea masiba, ke botšo, ke masiba a eona kaofela. Empa e—e thebe e khubelu e a mo sireletsa.

15 Ke batla hona hoo. Ho sa tsotelehe na re leka ho lōka hakakang, re sa le baetsalibe. Empa thebenyana e khubelu eo feela ke phetho se hlokahalang ho e khetholla ho linonyana tse ling. Ke phetho se hlokahalang ho re khetholla ho lefatše, ke nthoana eo, thebe e khubelu ea mohau oa Hae.

16 Re tla hoseng hona ha Paseka, joalokaha re shebella hoseng ho hong le ho hong ha Paseka, ho phutheha ka malungoane ana ha letsatsi le chaba. 'Me ebile monyetla oa ka, lilemong tse ngata tse fetileng, ho tla koano tabernakeleng le ho kolobetsa batho, le ho ba rerela tsoho ea Morena Jesu.

17 'Me ke ne ke ntse ke bala, maobane mantsiboea, khabareng ea sefefe, ka nahana, "Ebe mantsoe a ka tšoanelehang ho boleloa, hoseng, tšebeletsong ena ea tsoho e ka ba afe?" Eaba mehopollo ea ka e oelana le sehlooho sena seo moena oa rōna a tsoa se bala, sa Jobo khaolo ea 19, le e—le litemana 23 ho fihla ho 27. "*Ke A Tseba Molopolli Oa Ka O A Phela,*" Jobo o boletse. 'Me ke khethile sehlooho seo.

18 'Me ha re e tla, re tlela'ng? Ke ka morero ona, feela, re tle re fumane litšepo tse ncha.

19 Re holim'a lefatše lena mona, 'me re tseba re phela lefifing. Ha re a tlameha ho hakanya lintho tsena feela, le ha e le ho ithetsa, ka mokhoa oa teng, hoba re tseba re phela meriting ea lefu. Nako le nako ha re utloa amalanse e ngaea, ha re feta setša sa mabitla, ha re bona kokelo, moriri o mong le o mong o moputsoa, o òmela mehopollo ea rōna ho thoe re batho ba habileng tšenyeho, ho ba bacha le ho ba baholo 'moho.

20 'Me re tla hoseng ho tjena, ho roalla litšepo, litšepo tse ncha tsa seo re se tletseng mona, le seo morero o leng sona. 'Me ke hopola ena e le nako e babatsehang ho nahana ka litšepo tseo Molimo o re fileng tsona. Joale re batla ho rala taba ena, pele, mohopolong oa rōna, hore ha ho letho le ka re timetsang pele ho phethiloe morero oa Eo Ea re bōpileng. Ho ke ke ha ba le letho. Re etselitsoe morero.

21 Kereke ena e hahilo e mona ka morero. Motheo ona ha o a chekoa, 'me ha behoa lejoe la sekhutlo, ha behoa liboloko ho—ho moaho, le marulelo le bokahare, ha li a behoa mona feela ho bona haeba e ka etsoa. O behiloe ka morero mona, kapa bakeng sa morero.

22 Lelapa leo u phelang ho lona, ha le a hlangoa mono feela ka tšohanyetso, kapa motho ea sentseng nako e itseng feela. Lelapa la hao le entsoe ka morero, ho sebeletsa morero.

23 Haeba u khannile, hoseng hona, ho tla mona, ka sepalangoa sa hao, sepalangoa seo ha se a etsoa feela ho bona haeba se ka

boptjoa na. Lisebelisoa ha li a senngoa ke motho. E behetsoe morero mona, le phethisa morero.

²⁴ Liaparo tseo u li aparang, ha li a etsoa feela ho bona haeba motho a ka roka selo. Li etselitsoe morero.

²⁵ Lijo tseo u li jang, ha li a lengoa lefatšeng feela ho bona feela li metse. Li etselitsoe ho sebeletsa morero.

²⁶ 'Me Molimo o ne o sa lokela ho etsa sefate e tle e be sefate feela. Sefate seo O se etselitse morero.

²⁷ 'Me Molimo ha o a etsa 'na le uena, ho bona feela haeba O ka etsa hoo. O re entse ka morero. Ka baka leo, morero oa ho ba ha rōna mona bohle o teng. Ha u mona feela ho ba motho e mong feela. U mona hobane Molimo o u entse ka morero o ikhethang. Ha u mona feela ho ja lijo tse melisitsoeng ke Molimo. Ha u mona feela ho aha tlung eo—eo motho a e hahileng, kapa ho apara liaparo tseo motho a li rokileng. U mona ka morero o ikhethileng. Ho sa tsotelehe bootloana ba hao, boholo ba hao, u bohlokoa hakakang, kapa ha u bohlokoa hakakang, u mona ho sebeletsa morero.

²⁸ Joalo feela, ka monoana oa ka o mona ka morero. Lenala la monoana oa ka le etselitsoe morero. Leihlo la la ka, le karolo efe le efe ea mebele ea rōna, ke ho sebetsa morero. 'Me ha e a hlongoa mono feela ho bona kamoo e tlang ho shebeha kateng ha e hlongoa mono, empa e beiloe mono ho sebeletsa morero. E ne e le leano la Molimo le Khethehileng ho etsa joalo.

²⁹ 'Me haeba re hlonngoe mona ka morero, ka hona ha ho letho le ka re timetsang pele morero oa Molimo o phethisoa. Ha ho letho le ka re hlahisetsang kotsi pele morero, oo Molimo o re beetseng ona mona, o bonahalitsoe. Ho sa tsotelehe mathata a makae a re hlahelang, lipelō tse kae tse robhileng le mahlomola ao re fetang ho ona, lintho tsena tsohle ke lipheo, 'me sepheo sa eona se teng.

³⁰ Re tla nka, ho tea mohlala, Nohe, ka Bibeleng. Ho kile ha fihla moroallo, 'me ha timetsoa lefatše lohle. Limela le ntho eohle tsa timetsoa ha e se Nohe le peō a e kentseng arekeng.

³¹ Morero oa Molimo o ke ke oa hloleha le ka mohla. Ha ho letho le ka o hlolang. Ka hona re tlameha ho thaba ha kae kajeno, ho phomola holim'a tšenolo e khabane eo ea Lentsoe la Molimo o phelang, hore ha ho letho la lintho tsa joale, kapa tse ka tlang. Ha ho pabo, ha ho mahlomola, ha ho lefu, ha ho litlokotsi, ha ho letho le ka arolang morero oa Molimo o phelang. Seo Molimo o se lekantseng mohopolong oa Oona, seo Molimo o se rileng pelōng ea Oona, ho se phethisa; ha ho letemona, ha ho matla, ha ho letho le ka re arohanyang le leano la Molimo o moholo o sa shoeng, la Bosafeleng. E tšoanela ho lula kamoo Molimo o boletseng.

³² Re ntano fumana, matsatsing ao mohla lefatše lohle le neng le tla timetsoa ke moroallo, Molimo o entse boitlhophiso.

Boitlhophiso ka morero ofe? Ho baballa morero oa Oona. O e entse matsatsing a Nohe.

³³ 'Me O e etsa kajeno. O entse boitlhophiso, ho bolokela morero oa Oona. O tla boloka Kereke. O tla boloka batho. O tla boloka maloko a 'muso oa Hae o moholo, oo lefu le sa tl'o o timetsa. 'Me re elleloa hona re ho lumela ka tumelo, empa tsoho e hlahisa motheo o tiileng moo tumelo ea rōna e ka phomolang teng. Ha ho letho le ka e timetsang. Joaloka seroki ha se kile sa ngola:

Oh, tatso ea khanya e Mokhethoa e kakang!
Mojalefa oa poloko, o rekiloe ke Molimo,
O tsoetsoe ke Moea Hae, o hlatsuo e Maling a
Hae.

³⁴ Tiisetso e kakang, holim'a Lefika lena le tiileng, tsoho ea Morati oa rōna ea bokoang, Morena Jesu. Ha ho letho le ka e timetsang. E lenngoe. Ke Peō ea Molimo. Ke morero oa Molimo ho re nea Moea o Halalelang o bokoang. Ke morero oa Molimo ho re bontša lipontšo le meeka le mehlolo. Ke morero oa Molimo, 'me ha ho letho le ka o timetsang. Matla ohle a lihele a loana khahlano le ona, empa o tla hlola. Re tsoere pallo ea Molimo ea Bosafeleng. Ho ka ba le baruti, ho ka hlaha mekha, ho ka hlaha mananeo a maholo, ho ka hlaha lintho e ka li ka o timetsa, empa o ke ke oa timetsoa le ka mohla. Ke morero oa Molimo ho bona hore o tla hlola. Ka hona, ha o a itšetleha ka 'na, 'me ha o a itšetleha ka uena, hore o tla timetsoa kapa che. O itšetlehile ka Molimo. 'Me re ka phomola holim'a eona re kholisehile, hore Molimo o ke ke oa lumella lefa la rōna ho senngoa le ka mohla, hoba ke morero oa Oona ho re nea lona.

³⁵ Joale re ka nahana, hape, kajeno, ka litšenyoye, tse lekang ho senya. Re tsoere tšepiso ea Kreste ka sebele.

³⁶ Re hopola bana ba Baheberu, mohla Molimo o ba reretseng morero. Mohla ba leng tlase Babilona, 'me sebopi sa besoa hasupa ho feta mehleng le ka mohla, ho senya morero oa Molimo. 'Me Babilona eohle e befile. Ba ne ba ikemiselitse, Satane ehlile, ho senya morero oa Molimo, hoba o tsebile bana bao ba tla kena seboping sa mollo. Eaba o besa sebopi, eitseha ba se hotetsa, makhetlo a supileng ho feta, ho ikholisa hore lenaneo la Molimo le tle le senngoe. Empa Molimo o no o batlile ho bonahatsa matla a Oona, 'me Babilona eohle le lihele tsohle li ke ke tsa hlola morero oo. Che, monghali. Leha e ka ba ba hotelitse sebopi seo ha milione ho feta, se ka be se sa senya morero oa Molimo. Molimo o no o batlile ho supa hobane E ne e le Molimo oa toelo, 'me O tla loela mang le mang eo O lakatsang ho mo tlišetsa eona, 'me ha ho letho le ka sitisang lenaneo la Oona.

³⁷ Ea re ha ba besa sebopi, le hanyenyane Shadrake, Meshake le Abedneko ha ba tseba ba tla tsoa seboping seo. Hoba ba itse, ka bobona, "Molimo oa rōna o khona ruri ho re loanela. Empa, le ha ho le joalo, re ke ke ra inama pel'a setšoantšo." Molimo o

no o bolokile motho o O sebeletsang, 'me morero oa Oona o ke ke oa hloloa. Mollo o ke ke—ke ke oa hlola leano la morero oa Molimo.

³⁸ 'Me, oh, ke rata hakakang ho bua sena, hoseng hona. Libomo tsohle tsa haedrojene lefatšeng lohle li ke ke tsa hlola tsoho ea Kereke ea Oona. Lihlaloso tsohle tse hanetsang, le lipalo tsohle, le—le lintho tse joalo, tseo lefatše le bohla le na le ikhakantseng ka tsona, morero oa lona e le ho etsa se seng ka eona, ho senya tumelo ea bana ba Molimo, e ke ke ea atleha. Tumelo e tla phela e tsoele pele kamehla.

³⁹ E ne e le morero oa Molimo ho itšupa O na le matla holim'a libata tse hlaha tsa linaha. 'Me ka mohla o mong ba hlahletse litau tse 'maloa lehaheng. 'Me ba li bolaisa tlala ho fihlela li lapile hona, hoo li neng li ka harola e—e motho likotoana, ka ho phaila haholo hang feela. 'Me liabolosi a nahana, "Ruri, nka timetsa moporofeta enoa, Daniele."

⁴⁰ Empa Daniele o ne a rerile pelōng ea hae ho phethisa morero oa Molimo. 'Me Molimo o o behile pelōng ea hae. Le pele Daniele a nyoreloa takatso ena, ntho e ne e tlamehe ho bopa takatso eo pele. Pele a ka fumana tumelo eo, ntho e ne e tlamehe ho 'molella hobane Molimo o ka lopollang o teng.

⁴¹ 'Me, oh, ntho eo e momahana hakakang hoseng hona, le tumelo, tumelo e phelang ea Molimo o phelang, ka Kerekeng ea Oona. Ntho e teng e buang pelōng ea rōna e re bolella ka Lefatše mose ho leliboho. Ha ke khone ho supa Lefatše leo, le motho ofe a ka sitoa, empa ntho e ka ho rōna e re bolella hoo:

Lebitla ha se phehello ea bona;
'Me u lerole, u tla khutlela leroleng,
Ha ho a buuo a ka moea.

⁴² Ntho e teng ka ho rōna, mollo o tukang, leseli le hotelitsoeng ke Molimo, 'me ha ho litsokotsane tse ka le timang. Ha ho mehatsela ka kerekeng, ha ho monyemo hara batho, ha ho hloriso ea lefatše, e ka timang lelakabe le hotelitsoeng ke Molimo. Hoba ke morero oa Molimo hore leseli la Oona le hotelitsoeng la tokoloho le tla tuka ho Khutla ha Morena ho tle ho be ho fihle, 'me ha ho matla a ka le timang. Ba mpa ba tla le halefisa ho tuka ka khanya e fetisang ha ba butšoela. Mengoaha e kholisitsoe hore hloriso e matlafatsa Kereke.

⁴³ 'Me Daniele, ha a tseba Molimo o tla e phethisa joang, ha a tseba haeba Molimo a tla e phethisa, o mpa a tsebile O na le bokhoni, hape, ho e phethisa, 'me a tseba ntho e botebong ka ho eèna e 'molella joalo. Le a bona, Molimo o no o na le morero. O no o hlomme sohle ho sebeletsa morerong oo.

⁴⁴ 'Me tsohle, kajeno, ho sa tsotelehe monyemo oa rōna o itšupang ka linako tse ling, le kamoo lintho li tlohang li makatsa, le kamoo Kereke e kenang maemong *ana* le maemong *ane*, ntho eohle ke morero oa Molimo o Mokhethoa ho re bopella le ho re

etsa ka tsela ea Oona ka Sebele. Ea tsebang ho betla thepa ho feta 'Mopi ke mang?

45 'Me litau li sitiloe ho ja moporofeta, ka ha Molimo o rometse Lengeloi. Oa emisa Lengeloi le leng teng ho sireletsa moporofeta enoa, hoba morero oa Molimo o no o le teng. A batlile ho bontša khosi e ikakasang eo letsoho la Oona le leholo le morero oa Oona.

46 Ke hopola e le sona se etsahalang kajeno, Molimo o ntse o hlophisa batho, O tle o bontše letsoho la Oona le matla, ho phethisa morero oa Oona o moholo. Oh, ke thabile haholo, hoseng hona, ha e le moo O phela pelōng ea ka, ha e le moo e se Molimo o shoeleng. Ke Molimo o phelang. 'Me tlase koana botebong ba ka . . .

47 Maobane hoseng, ha ke lutse setulong sa mokuti, ho kuta moriri. E le ha ke kutoa ke mohlankana, tlase levenkeleng la Moena Egan. 'Me ke lutse mono feela, ke inamisitse hlooho. 'Me, oh, ke khathetse hona. E sa le likōpano tsa ka li le telele, 'me ke ntse ke leka ho tsamaea, hoseng, ho kenela nakoana ea phomolo pele litšebeletso tse hlahlamang tsena li qala. 'Me ke ne ke khathetse haholo, e ka pelō ea ka e tla emisa ho otlā. 'Me ea re ke sa lutse mono, hang feela, ka utloa e mong le e mong a bua, empa ea ka ke kantle koana sepakapakeng.

48 Ka nahana, "Na ebe ke futuhetsoe ke pelō, 'me ke falla setulong sena sa mokuti?" Ka nahana, "Na ebe ke sona se etsahalang?" Ka phopholetsā matsoho a ka; a shoele bohatsu. 'Me ea ka pelō ea ka e tla emisa ho otlā. 'Me ka nahana, "Oh, empa Evangeli e teng e tlameha ho reroa. 'Me ha ho matla a ka ntlosang pele morero oa Molimo o phethiloe."

49 Ha ho letho ho ntša kotsi, le letho, pele morero oa Molimo o phethiloe. 'Me mohla hoo ho phethiloeng, ke batla ho tsamaea le morero oa Oona 'moho. Mohla O qetileng, ho joalo le ka 'na, hape. Mohla O qetileng ka 'na, ke qetile ka bophelo.

50 Mohla O qetang ka uena, ho felile ka uena, hape. Ka baka leo e etsa phapang efe? Molimo o e tšoere eohle letsohong la Oona. Re le bacha kapa re hōlile, ha re tsebe mohla morero oa Molimo o tla phethoa le ho qetoa. Molimo o nka masea, ka linako tse ling, ho itsūpa O khona ho tataisa moeanyana oa bona. Sohle O se etsa ka morero. O boletse, ha ho serobele se ka oang leholimōng, O sa se tsebe. Sohle se etsetsoa morero oa Oona, ka hora feela hantle le ka nako. Ntho eohle e leanong la Oona le Mokhethoa. Ha ho letho le ka senyang.

51 E ne e le kholiso e kakang ho Abrahama, hoba a fumane Molimo, le ho tseba Molimo o na le morero. Hore, morerong ona, O ne o tla hlahisa, ka Abrahama le Sara, mora. 'Me ka mora enoa, Isaaka, ho tla hlaha Morena Jesu. 'Me morerong ona, O ne o tla hlahisa Sara le Abrahama, o ba etse batho ba baholo le ho hlahisa mora enoa; ho nka batho ba babe ho fetisa ho thloa, ho e phethisa ka bona.

⁵² Ho makatsa hakakang, Molimo o tsamaea ka litsela tse mohlolo! Be, ea ka re, haeba O batlile ho hlahisa ngoana ka ntho, ho lefatše ka mokhoa oo, O ka be o nkile mosali ea letheka le bonolo. Ea ka O ka be nkile monna ea itseng ea sa omellang bophelo. Joaloka Abrahamama le Sara, ba nyalane lilemo tse ngata, ngata, 'me a omeletse letheka. A ke ke a tsoaloa ngoana. Be, ea ka, mohlang oo, O ka be o nkile mosetsana ea itseng ea letheka le bonolo, ea ka beng a hlahisitse ngoana enoa. Empa Molimo o rata ho pepesa mohau oa Oona. Molimo o rata ho nka ntho e seng letho le ho etsa ho hong ka eona, hoba Ke 'Mopi.

⁵³ Lebaka leo A nkileng uena le 'na. Re ne re se letho, O tle o re etse bana ba Oona ka Sebele, ka rōna ba neng ba le soto, le malimabe, le ho lahleha, le sefofu, le ba sa rateheng, ho re etsa bana ba Oona ba ratehang. Ke morero oa Molimo ho etsa joalo.

⁵⁴ 'Me hape, le hona, ea ka Molimo o ka be o nkile mosetsana le mohlankana, ho etsa sena, mosetsana le mohlankana ba sa tsoa nyalana. O ka be o itse, "Joale, ha le na bana. 'Me Ke tla le nka, mora oa lōna oa letsibolo, 'me Ke tla . . . E tla ba Isaaka oa Ka."

⁵⁵ Empa Molimo oa khetha monna oa lilemo tse mashome a supileng a metso e mehlano, le mosali oa mashome a tšeletseng a metso e mehlano, ho phethisa morero oa Oona, ho bontša hobane u ka ba mocha kapa motsofe, Molimo o ka khona le joale, 'me o tla khona, ho sebeletsa morero oa Oona. Ruri. 'Me mohla Abrahamama a leng mashome a supileng a metso e mehlano, o fuee tšepiso ea Molimo. A e bolella Sara.

⁵⁶ 'Me joale liabolosi o itse, "U a tseba ke'ng? Ke tla e liehisa nakoana feela. Ke a kholoa ha nka ba tsofatsa haholo hakana, ba tla lahla tumelo, 'me ba tla tseba hobane e ke ke ea etsahala. Haeba ba se ba ntse ba tšerema ho mashome a supileng a metso e mehlano; ha nka e lebalisa nakoana feela!" 'Me eaba o e lebalisa ho fihlela Abrahamama le Sara ba khokhoba boqhekung, meriri e pulufetse le mahetla a kobame.

⁵⁷ Ho bontša ho se letho le ka fenyang morero oa Oona. Esita le lefu le ka sitoang ho fenya morero oa Oona. "Abrahamama o ne a se a ichoeletse." Le popelo ea Sara e sa le e shoelile lilemo tse mashome a mane kapa tse mashome a mahano, empa ha ho letho le ka fenyang morero oa Molimo. 'Mele oa hae o ne o tsofetse; o sosobane; methapo ea lebeso e omeletse. Pelō ea hae e tšerema hoo a ka sitoang ho emela pelehi. Empa Molimo mono o a re tsebisa, hobane morero oa Oona o ke ke oa sitisoa. O ile oa fetola Sara, 'me oa mo etsa mosetsana hape. Le ho nka monna, oa lilemo tse lekholo, 'me oa mo khutlisetsa bocheng ba hae.

⁵⁸ Ho sa tsotelehe e bonahala e se na mabaka hakakang, Molimo o entse tšepiso. "'Me Abrahamama ha a ka a sisinyeha tšepisong ea Molimo, ka ho se lumele; empa a ipha matla, a ntse a rorisa Molimo, hoba o Mo ahlotse, ha thoe O khona ho phethisa seo O se tšepisitseng."

59 Hoseng hona re tlameha ho ba eng? “Re bana ba tšepiso ea Oona. Ha re shoele ka ho Kreste, re Peō ea Abrahamama, ’me re majalefa le Oona, ka pallo.” Ka hona, ho sa tsotelehe ho fihla ho kula ho hokae, re shoa lefu la mofuta ofe, re apareloa ke bofuma bo bokae, morero oa Molimo ha o ka ke oa fekisoa. O tla boela a re tsoa. “E re ka ha Ke phela, le lōna le tla phela ke hona.” Ke tšepo ea rōna eo.

60 Ke a tseba, kajeno, ke letsatsi la ka la tsoalo, ’me ke a hola ke ba monna oa leqheku. Ke icheba seiponeng ’me ke bona moshanyana e monyenyanane eloa, ea hahileng tabernakele ena, ha e sa le moshanyana e monyenyanane hape. E eba leqheku la monna, mahetla a kobama, litelu li a pulufala, moriri o a motsuha, empa ha ho letho le ka fenyang morero oa Molimo. Ha ho letho le ka khonang! Ka baka leo ke iphomoletse ke tiile tšepisong, “E re ka ha Ke phela, le lōna le tla phela ke hona.” Ke iteanya le Jobo oa mehleng, “Ke a tseba molopolli oa ka o a phela, ’me O tla ema lefatšeng ka letsatsi la bofelo.” Ke morero oo Molimo a o bolokileng. Ke tšoanela ho sebeletsa morero ona. Bophelo ba ka bohle bo tšoanela ho kenngoa morerong oa Oona, le kahar’a lenanelo la Oona. E mong le e mong oa rōna o joalo. Molimo o na le morero moo . . .

61 Motsofe Abrahamama o khonne—khonne ho mamella, a ntse a bona Eo Ea sa bonoeng, hobane e ne e le morero oa Molimo, o tsebile hobane Molimo o mo file tšepiso. Eona, ho sa tsotelehe lintho tsohle li bonahetse li hanyetsa ha kae, Molimo o file Abrahamama tšepiso eo. Ka hona, Molimo oa phethisa tšepiso ea Oona. O entse hoo, ho Abrahamama. O e entse, ho bana ba Oona bohle. ’Me O tla boloka tšepiso ea Oona.

62 E ne e le Moshe, mohla a rutehileng bohlaeng bohle ba Baegepeta, o tsebile Molimo o na le morero bophelong ba hae.

63 E ne e le Jokobeta, ’mè oa hae, ea rutileng lesea leo moratuoa oa hae, lesea le fetisang ka botle lefatšeng lohle, mehleng eo, mothaka ea mosa; oa mo kenya arekeng oa mo sutumeletsa kantle har’a Nile, athe likoena li ne li hakotse li jele bana ba Baheberu, hoba ba ba fepile likoena. ’Me a nka lesea la hae ’me a le sutumeletsa hantle kantle litleneng tsa lefu, a ntse a tseba sena, a re morero oa Molimo o ke ke oa fekisoa. “Molimo oa Abrahamama, lisa lesea la ka, o le akofisetse morero oo O le hlahiselitseng ona.” Ho ne ho se metsi a lekaneng ho Nile hore a ka noela. Ho ne ho se likoena tse lekaneng lefatšeng lohle ho mo koenya. E ne e le mokhethoa oa Molimo.

64 ’Me joaloka ha e ne e le mokhethoa oa Molimo, bakeng sa morero oo, kajeno re bakhethoa ba Molimo, ba lumelang tsohong ea Morena Jesu. ’Me ha ho libomo, ha ho lihele, ha ho letho lesele le ka falatsang morero oa Molimo. Re tlameha ho kena tsohong. Ke tšepiso eo re e tšoereng ea Molimo. Morero oa Molimo.

65 'Me, Moshe, ha a tšoara lilemo tse mashome a mane tse tletseng, monna oa lilemo tse bohareng, o ne a koetlisitsoe sekolong. Empa tsela ea Molimo e hlophisitsoe tjena, ka linako tse ling, ea ho phethisa lintho tsa Oona, tseo O li tšepisitseng. Kamoo O isitseng Moshe motšeo ho lehoatata, oa mo utloisa lillo le melumaelo, a sa thekesela feelleng. 'Me motšeo mono, a le mong lehoatateng, le har'a meea e bobolang, liphepeng le lik'hobra, 'me, a le mong, kantle feelleng, a batla a timela. Ha ho letho ho fekisa morero oa Molimo. Molimo o no o hlahisitse Moshe, 'me Moshe a tlameha ho phethisa seo Molimo o 'moleletseng sona, ka ha morero oa Molimo o ke ke oa fekisoa.

66 E ne e le tlhaka ea rōna, hoseng hona, Jobo, mohla a na a tebile matsoalong a hae, maruo a hae ohle a mo phonyohile. Bana ba hae ba shoele. 'Mele oa hae o tsoile mathopa. 'Me a hohlometse matsoalong a maholohali a kileng a kena ho ona. A lutse thotobolong, ka lengetana, a fala mathopa. 'Me mohatsa'e monyako, "Hobaneng u sa rohake Molimo oa shoa?"

67 Mohla litho tsa kereke ea hae li mo hlobohileng, matsatsi a supileng, li mo qosa. Athe, ba tlamehile ba be ba mo tšelisa. Empa ba mo qosa ka ho ba moetsalibe oa sekhukhu, ba mo qosa ba re o oele mohaung.

68 E ne e le horeng e khōlō eo, e ne e le motsotsong o moholo oo, e le mohla Molimo o isitseng Jobo mahlabatheng a halalelang; moo O isang molumeli e mong le e mong, boiphihlelong, motšeo ho lehoatata, joaloka ha O entse Moshe; sekhutloaneng se sephiring, moo A u isitseng; mokhoroaneng oa mashala, moo ke O amohetseng. Molimo o na le sebaka, le morero, le nako. 'Me mohla O kentseng Jobo maamong ana, O ne a mo behile mahlabatheng a halalelang, hoba A ne a tla mo senolela taba, e beng e sa tl'o sutha le ka mohla.

69 Oh, mahlabathe ao a halalelang! O tlameha ho isa ngoana e mong le e mong oa makhonthe mono. O u beha libakeng tseo, moo ho seng liabolosi ea ka fihlang. Ha ho moruti ea ka E pheulang ka tlhaloso. O u neha ntho mahlabatheng ao morao mono, ea boiphihlelo, u ke keng ua e lebala ha mengoaha e ntse e thetheha; ho sa tsotelehe na 'mè oa hao ha a lumele hakae, ntate oa hao, monna oa hao, mosali, balekane ba hao, ba ka bang kateng. Molumeli e mong le e mong o na le setša seo Molimo o kōpaneng le eena. Ha ho a sala le a mong. Molumeli e mong le e mong o na le sona. Motho e mong le e mong ea tšoaloang ke 'Muso oa Molimo o tseba setša seo, motsotso oo, hora eo moo Molimo o mo isitseng teng. 'Me mahlabatheng ao a khethehileng, ka pel'a Sefahleho sa sehlahla se tukang, O etselitse molumeli eo se seng, seo kelello eohle ea lefatše e ka sitoang ho se falatsa. "Holim'a Lefika lena, Ke tla haha Kereke ea Ka, 'me likhoro tsa lihele li ke ke tsa E hlola." Holim'a Lefika lena, tšenolo ea moea ea Jesu ea tsohileng! Holim'a Lefika lena!

70 Jobo, matsoalong a hae, ntho eohle e felile. Mohatsa'e a mo hlanohetse, a ntse a mo qosa. 'Me metsoalle eohle ea hae ea balumeli ba mo hlanohetse hobane ba ne ba tšoere thutabomolimo feela. 'Me bohle ba mo hlanohetse.

71 Empa Molimo oa re, "Tloo mona, Jobo. Ke tla u fa se seng, moshanyana. Ke tla hloma ka ho uena seo boliabolosi bohle ba lihele ba ke keng ba se hlokola ba se ntša." 'Me ka ho . . . Moruti e mong le e mong lefatšeng a ka u qosa, ka mokhoa ona kapa oane, empa e ke ke ea sutha. Na le tseba seo a se entseng? A mpa a phetla lesira nakoana, le ho re, "Jobo, sheba koo!" 'Me Jobo o boneng? Le nahana hobane u bone'ng? O bone Paseka, khetlo la eona la pele. O bone Paseka ea pele, 'me a hooeletsa, "Ke a tseba Molopolli oa ka o a phela!"

72 Oh, ke tulo e bokoang ha kae eo ho fihla ho eona! Monna e mong le e mong ea khethuoeng ke Molimo, le mosali e mong le e mong le ngoana, o fihla setšeng seo sa mahlabathe ao a khethehileng, moo Molimo a phetlang lesira 'me u Mo bona ka matla a Oona a tsoho. U a tseba hobane O a phela. 'Me rōna, joaloka Jobo, re ka hooeletsa, "Ke a tseba Molopolli oa ka o a phela, 'me O tla ema holim'a lefatše matsatsing a bofelo. Leha liboko tsa letlalo li senya 'mele ona, koana ke tla bona Molimo ka nama ena."

73 Pono eo ea pele ea Paseka e chochile moporofeta ho hooeletsa. 'Me lialuma tsa rora, le mahalima a tsekema. O bone Paseka, khetlo la eona la pele. O e bone neng? E seng mohla a na apere liaparo tsa hae tse bonolo; e seng mohla a na phophothile moriri oa hae, mohlomong, ho fihla qōleng; e seng mohla a na hakotse hamonate 'meleng. Empa mohla maqakabetsi a hae, mohla a sekameng bothateng, mohla hora eo, a batla a le ntšing tsa lefu, ke mohla a boneng Paseka. O bone tsoho ea pele moo.

74 Oh, 'na le uena re hlahetsoe ke hona hoo. Ke mohla re ne re robetse aletareng, nqa e 'ngoe, ho fihela re ikemiselitse ho shoa, le ho re, "Morena Molimo, nketsetse ho hong!" Ke mohla Molimo o no o phetla lesira 'me ra bona Paseka.

75 Re bona Paseka, e seng ka mokhoa oa thutabomolimo, hakaalo. Ha re a bona Paseka, e le ho apara liaparo tse ncha. Ha re a bona Paseka, joaloka mebutla le mahe a mebalabala. Re bona Paseka ka matla a tsoho a Morena Jesu Krete. E ne e le Paseka ea mannete eo.

'Me ha a hooeletsa, Molimo o arabetse ka Mollo.

76 E ne e le Davida mohla a khesitsoeng 'me a lelerisitsoe. E ne e le Davida, hoba a etse sebe 'me a entse bolotsana bo nyarosang boo. E ne e le Davida mohla a tsielehileng 'me mora oa hae a hapuo, thabo ea pelō ea hae. E ne e le Davida, moporofeta le khosi, ea hooelitseng mohla a iponeng a ntse a tsofala, 'me o tšoanela ho khutlela leroleng la lefatše. E ne e le Davida ea itseng, "Le hona, nama ea ka e tla phomola ka tšepo, hobane O

ke ke oa lesa Mokhethoa oa Oona hore a bone ho bola, le joalo O ke ke oa tlohela moea oa Hae liheleng.”

⁷⁷ Ke mohla Davida a qauoeng mehleng ea hae e kotsi ho fetisa. Ke mohla Davida a na tsielehile 'me a ferekane, hona horeng ea lefu, re ka rialo, ke mohla Molimo o phetlang lesira, ho re, “Sheba koana, Davida!”

⁷⁸ Davida o itse, “Nama ea ka e tla phomola ka tšepo, hobane O ke ke oa lesa Mokhethoa oa Oona hore a bone ho bola. Le joalo O ke ke oa tlohela moea oa Hae liheleng, ka baka leo nama ea ka e tla phomola ka tšepo.”

⁷⁹ Oh, ke hona horeng eo, motsoalle. Ke hona nakong eo. Ke hona lihoreng tse hlokosi tseo, tse thakhisang mohla re bonang tsoho. Ke hona nakong eo, ke mohla Molimo o ratang ho pepesa mohau oa Oona. Ke hona nakong eo mohla Molimo o ratang ho tšelisa bana ba Oona.

⁸⁰ Hora e lefifi ho fetisa eo lefatše lena le kileng la e bona e ne e le Labohlano le Molemo; mohla litšepo tsohle, hohle ho neng ho ngoliloe, litšepo tsohle tsa bona li ne li ngotsoe pampiring. Litšepo tsohle tsa bona e le se boletsoeng ke mofilosofo ea itseng, 'me Khosana ea Bophelo e le eo e shoa Kalvari. E ne e le hora e lefifi le fetisang eo lefatše le kileng la e bona.

⁸¹ Empa Paseka e hlalishitse hora e phatsimang ho fetisa eo lefatše le kileng la e bona, hobane litumelo-khoela tsohle le lipelaelo tsohle, le litšabo tsohle, li tlositsoe mohla Molimo o no o Mo tsosa.

Hobaneng ho ne ho fifetse? E fifatsoa ke'ng?

⁸² Ha re e saleng morao, joaloka ha ke buile nakoana e fetileng, ka linonyana, ka lipalesa. Ka, hobaneng mehalalitsoenyana ea Paseka e thunya ka Paseka? Hobaneng linonyana li bina sehlang sa selemo? Hobaneng lipalesa li thunya? Ke hobane lehlabula le tla hlhlama. Hoo ho etsoa ke'ng? Ka Hlakola, khoeli ea rōna e batlang e le mpe ka ho fetisa, mariha e sa le a le tseleng, hape, hape, hape, ho fihlela a otlala ho qetela, a ntano honyela, ho suthela bophelo. Lefu le otlile petso ea lona ea ho qetela. Le tšoanela ho honyela le ho lumella bophelo ho nka malulo a bona.

⁸³ Ho fifala ke'ng pele ho letšehare? Ho fifala ho fetisisa pele ho letšehare. Re a bolelloa, ke boramahlale, ke leseli le hatellang ka matla, le tlang, le ntse le theoha. Letsatsi le pota le nyoloha le ka morao ho lefatše. 'Me leseli le petetsa lefifi ka matla. Le otlala khetlo la lona la ho qetela. Ha le sa khona ho mamella hape. Lefifi le sitoa ho ema ka pel'a leseli. Le ke ke la khona. Leseli le matla ho lefifi ka makhetlo a limilione tse leshome, ka hona leseli le lefifi li ke ke tsa aha 'moho. 'Me leseli ha le qala le phahama, lefifi le a bōba le a patisana. Le patahana hammoho.

84 Ho joaloka ho rothetsa enke e—e bateng e hlatsoang e tletse bolichi. Ha e sa hlola e fumanoa. Botšo ba enke ha bo sa fumanoa ha e rothetsoa boliching. E fetoha bolichi, boeona.

85 Oh, le sebe se joalo. Ha se rothetsoa Maling Mopholosi, ha se sa fumanoa feela. Se nyametse. Ha ho makatse A itse, “Se leoatleng la tebalo.” Bate ea Molimo ea bolichi ha se sa tla fumoana hape. Se qhaqholoha feela. Ha se sa fumanoa. Sebe se joalo le sona, hang ha u bona tsoho e mannete le moputso o lefeletsoeng tsoho eo.

86 Lefifi, le ipatisa 'moho, hobane le se le tla nyamela. 'Me hang ha leseli le fihla, lefifi le nyametse. Ebe le ea kae? Ho etsahetse'ng ka bosiu bo botšo boo, lihora tse 'maloa tse fetileng, le ne le leketlile ka tabernakeleng ena? Le ke ke la khona ho hlaha feela hona joale. Letsatsi le chabile. Le ile kae? Le phetlile karolo efe, kapa ebe le theohetse kae? Ha le a hlola le fumanoa feela. 'Me lebaka la lefifi, ka hobane leseli le ne le le sieo.

87 'Me lebaka leo motho a na a se na tšepo, tsoho e ne e le sieo. Empa Paseka e hlahisitse tsoho. Joale lefifi le nyametse. Leseli le chabile.

Re tla tsamaea Leseling lena, Leseli le letle
lena,
Le chaba phokeng ea mohau o phatsimang;
Re chabele rōna, letšehare le bosiu,
Jesu, ke Leseli la lefatše.

88 Bosiu bo a hatella, 'me joale re ka e lebisla sechaba ka bophara. Ena ke hora e lefifi le fetisang, hora e lefifi le fetisang e kileng ea chabela lefatše lena. Esita le tlhaho e a qhaqhasèla. Ka nako le motsotso, lefatše lena lohle le ka silakangoa phoofo. Ebe tšebetso ea haedrojene e ka hlhisang ho... tšebetso ea haedrojene kapa—kapa—kapa oksejene, kapa ea libomo tse ling tsena tse khōlō, tšebetso ea athomiki? Sefate ka seng, joang bofe le bofe, ntho e 'ngoe le e 'ngoe, lekala ka leng, morero ofe le ofe, motho mang le mang, ntho e 'ngoe le e 'ngoe, e ka qhaqholoha likotoana feela ea fetoha liesiti. Na le bona seo e leng sona? Lefatše lohle le ntse le qhaqhasèla. Libomo li malala-a-laotsoe.

89 Ntho e 'ngoe le e 'ngoe e bonahala e chehetsoe nako hantle. 'Me haeba nako ea lefifi chehiloe, ebe ea Leseli e chehiloe hakakang!

90 Lefifi le lekaale le bakoa ke'ng joale? Lintho tsena li etsoa ke'ng? Likereke tsohle li khaotse setsoalle. Re ntse re ngangisana. “Oh, na e teng? Ke Momethodise. Ke Moprebeteriene. Ke Mopentekosta. 'Na ke kereke ea Molimo. 'Na ke Moasemblisi.” Oh, na ha le bone, lōna bana? Hola e le phetho seo re neng re ka ema holim'a sona, re ka be re le batho ba soto ho fetisa lefatšeng.

91 Ke thabetse tuloana eo haholo, e ikhethileng, tuloana e tlase mona Ohio Avenue, ka mokhorong oa mashala, bosiu bo bong, moo Molimo o ileng oa phetla lesira. Methodise, Baptise,

Presbeteriene, Mapentekosta, li ile tsa siroha tsohle lekhateng leo, hoba ke bone Paseka. Ka bona Jesu joaloka Mopholosi oa ka. Ka Mo bona joaloka tsoho le Bophelo. “Ea lumelang ho 'Na —'Na, leha a shoele, o tla phela. Ea phelang 'me a lumela ho 'Na a ke ke a shoa le ka mohla.” Ke Mo bona e le Khosi le 'Musi a le mong, eona feela ntho e neng e ka nthusa, Moabi a le mong oa Bophelo Bosafeleng, Eèna feela ea neng a ka folisa maloetse a ka, a ka tlosa lipabo tsa ka, Ea neng a ka ntsosa matsatsing a bofèlo. O ile a ntumella ho sheba mose ho lesira, 'me ke Mo bone, tsoho. Eaba ke iteanya le Jobo, “Ke a tseba Molopolli oa ka o a phela!” 'Me mohla Methodise e nyametseng, kapa Baptise, kapa Presbeteriene, kapa Mapentekosta, Molopolli oa ka o sa ntse a phela ka ho tšoana feela.

⁹² U ka re, “Be, tsela ke *ena*, 'me ke eo tsela *eane*; haeba u sa etse *sena*, haeba u sa etse *sane*.”

⁹³ Ke tseba hantle ho feta, hobane nkile ka nyarela mose ho lesira la nako. Nkile ka ema litšeng tse khethehileng; 'moho le molumeli e mong le e mong ka mona. Ha ho diabolosi ea ka amang lehlabathe leo. Ha ho ngaka ea thutabomolimo e ka e pheulang ka tlhaloso. O mpholisitse mohla ke neng ke kula. O mpholositse ke lahlehile. O phela kamehla le mehla.

Mpotse na O phela joang?

O phela pelōng ea ka.

Ha a shoa, empa O tsohile bafung.

⁹⁴ 'Me lefifi le lehlo lona le akhōtsehang holim'a lefatše joale, ha se letho le mpa le hlalosa hore Leseli le hatella le sututsa tseleng ea Lona.

⁹⁵ Mohla lefu le leketlileng haufi hakaale, le ka hlaha nakong ea hora. Hora e le 'ngoe ho tloha joale, lefatše le ka shoa. Haeba lefu le leketlile haufi hakaalo, le etsoa ke'ng? Ke Bophelo, Bophelo bo a tla; tsoho, Paseka ea bana bohle ba Molimo. E hahaba fatše. E hatella ka matla. Mangeloi a theoha. Moea o Halalelang o moholo o kena kahare. Lefifi le ikakhela khetlo la lona la ho qetela, hoba Leseli le tla fihla mona kapele. Kreste o tla tla, thabo le tšepo ea mengoaha, tsoho ea mannete ea balumeli bohle. Hoba re tla arola le Eèna tsoho ea Hae, joalokaha re arotse le Eèna matšoenyeho a Hae. “Ea tšoenyehang 'moho le 'Na o tla busa le 'Na.”

Oh, ka hona, na nka isoa Hae Leholimōng ka moalo oa lipalesa tsa boiketlo,

Athe ba bang ba loanne ho hapa moputso ba sesisa maoatle a mali?

Che, ho busa ke tšoanela ho loana. Totisa sebete sa ka, Morena.

⁹⁶ Ke thapelo ea ka eo. Oh, ke se tsoe joaloka lekoala. Ha kea tšoanela ho likoloha, letsatsi ka leng, hlooho ea ka e kebisitsoe e lepeletse, eka hojane bomalimabe bo aparetse. Ha ke sheba lefatše le lefifi lohle la bona, le boitšoaro ba bona bohle; ke

tšoanela ho phahamisa hlooho ea ka, ke sunye hlooho ea ka har'a lintsu, ke ntse ke tseba sena, ho re, "Ke Mo tseba matleng a tsoho ea Hae." E re ka ha A phela, le rōna re phela ke hona. E re ka ha A tsohile bafung, le 'na ke sa tla tsoha. Le uena u sa tla tsoha. Ke sona seo Paseka e se boelang ho molumeli.

⁹⁷ Ha se khale mona, koana. . . Mohla Ntoa ea Pele ea Lefatše e khitlaneng. Eaba ba nyanyatsa ligase tse khōlō, tse kang gase e tšehla le ea tlelorini, me e le mahloko haholo. E ka tšoetsa tsohle ka chefu. Mahlaku a tla shoa, lifate li tla shoa, le joang bo tla shoa, ntho e 'ngoe le e 'ngoe, moo gase eo (gase eo e tšehla) e chesa ntho lore ha ba e lahlela.

⁹⁸ Moruti oa sesole, moso o mong Paseka, o ne a pholletsa le—le litente moo ho robetseng ba lemetseng le ba shoang.

⁹⁹ Eaba ho fihla mooki oa Sefapano se Sefubelu. Esale bashanyana ba loana halelele hakana, kantle mane, ba khathetse haholo. 'Me o ne a tšoare e—e lesihla la lipalesa letsohong, a feta liphateng moo bashanyana ba robetseng, ba lla. E ne e le ka Paseka. E ne e le Paseka e kakang ho bona; lifofane li hōba ka holimō, le libomo li rotha! O ne a rutla rosa a e neetsa moshanyana ka mong, a re, "Molimo a u hlohonolofatse. Molimo a u hlohonolofatse, moena." Masole ao a ne a fupara palesa eo ka matla 'me ba lla, hoba ba tsebile rosa eo e ne e lengoe naheng ea habobona.

¹⁰⁰ Moena, hoseng hona, re lefatšeng la ligase tse kotsi tse mahloko. Re lefatšeng la lithuto tsa mefuta le linyee, tse reng, "Tsoho ha e eo. 'Me pholiso ea Khalalelo ha e eo. Ha ho *sena*, kapa *sane*, kapa se se *seng*." Empa, ha se mooki oa Sefapano se Sefubelu; empa ho fihla Moea o Halalelang, hang ka nako, ho re beha mahlabatheng a khethehileng ao a mohau oa Molimo, me o qhatsetsa lipelōng tsa rōna lethoana leo le tsoang koana Lefatšeng le mose ho leliboho.

¹⁰¹ O itse, "Moreri, motsoalle," a re, "Ka ema mono ka lla, ka lla ho fihlela ke lla hakaale, ka ba ka re. . . E mong oa bashanyana a palame sethuthuthu, a tsoela mabaleng a ntoa, kantle koana a feta La Salle, Lorraine, 'me a ile a teng ho etsa ntho e kang e—e hlophollo. Le ho re. . . Ka re ho eēna, 'Sajene, na nka palama le uena?' A re, 'Ehlile, moruti, u ka se qhomela.' A re, 'U inkela. . . ' Ho re, 'Ho itōketse. Ke rata ho palama le uena feela.' Ho re, 'Ehlile, u ka se qhomela.'"

¹⁰² Ho re, "Ra palama ra ba ra fihla lehoatateng le cheleng leo, teng ho sa fumanoe le qobana la joang kapa ho se letho." Le ho re, "Nakong eo a ntseng a hlopholla thepa ea hae, a tle a khutlise molaetsa, kapa seo a neng a tla se etsa," a re, "Ka pota ka koana nakoana. Ka nahana, 'Oh, na ena ha se Paseka ea mofuta! Kantle koana naheng ena, moo libomo li helelitseng meaho ho fihla fatše, lifate li sothahane li hlotlehile, li le masoba a lithoaloana tsa machinikane, ha ho a sala le leqoba la joang.'" A re, "Oho

Molimo, sena ke setšoantšo sa lefatše lena, ka le leng la matsatsi ana, mohla sebe se qhobelaneng. Sena e tla ba setšoantšo.”

103 Le ho re, “Kelello ea ka—ea ka le mahlo tsa huleloa lefikeng le itseng.” Le ho re, “Ka ea teng, ’me ka nahana, ’Morena, hobaneng U batla ke eme pel’a lefika lee?” A re, “Ka phahamisa lefika leo, ’me, ha ke etsa joalo, mohalalitsoe oa Paseka o ne o hlalositse hlohoana ea oona. O ile oa sireletsoa mehleng ea sefefe. Mehlang eohle ea ligase tse chefu, tsa se ke tsa o khathatsa ka letho, hoba o ne o patiloe lefikeng.”

104 “Ke a tseba Molopolli oa ka o a phela.” Oho Molimo, ho sa tsoetelehe seo lefatše le se buang, mpate Lefikeng la Mengoaha, Morena. E tle re ha lifefe li fetile, nke ke phahamise hlooho ke boele ke phele. E re ka ha A phela, le rōna re phela ke hona. Molumeli ea kileng a fihla mahlabatheng ao, a ka reng, ea boneng lintho tsena? “Ke a tseba Molopolli oa ka o a phela.”

105 Kereke, lefatše, lona . . . le ea kerekeng hoseng hona; bongata ba bona, ho bontša baki e ncha; ba bang ba bona, ho bontša katiba e ncha. Ha ba sa tla ba bona hape ho fihlela Paseka e tlang. Le tsoela boipontši ba lefatše le lefeela. Bongata ba bona bo ea kerekeng, feela ho ipata ka morao ho libe tsa bona le ho ingolisa le mekhatlo e itseng e meholo, le ho re, “Ke *Sekete-kete*. Ke setho sa *Hore-le-hore*.” Ke phetho seo ba se tsebang. Ke phetho seo ba se lumetseng.

106 Empa, oh, ho rōna, hoseng hona, ka mohau oa Molimo, re kile ra ema moo Moshe a kileng a ema teng; re kile ra ema moo Jobo a kileng a ema teng; re kile ra ema moo Davida a kileng a ema teng; ’me re hooa ka lentsoe lohle la rōna, “Ke a tseba Molopolli oa ka o a phela, ’me O tla ema holim’a lefatše lena matsatsing a bofêlo; leha liboko tsa letlalo li senya ’mele ona, empa, ke tla bona Molimo ke le nameng ea ka, Eo ke tla iponela eëna; mahlo a ka a tla talima, ’me e seng a e mong. Ha re a tla le letho lefatšeng lena; ke lefeela le boikhantšo. Ruri re tla tsoa re sa nka letho. Morena o neile ’me Morena o nkile, ho bokoe Lebiso la Morena.” O ne a tseba ntho e le ’ngoe, “Molopolli oa ka o a phela!” Ha ho thoe, “O tla phela.” “O a phela,” ke lekhathe le tsoellang kamehla. “O a phela!” ’Me e re ka ha . . . Jesu o boletse, “E re ka ha Ke phela, le lōna le phela ke hona.”

107 Ha re inamiseng lihlooho tsa rōna, nakoana feela joale, thapelong e koalang.

108 Oh, kajeno, motsoalle oa ka, ea katlehileng motho oa batho, haeba u eso fihle nqalong ena! Oh, u re, “Ke etetse tabernakele mona, khafetsa, Moena Branham.” Ho a babatseha. Ke ananela seo. “Oh, ke etetse likereke tse ling. Ke utloile bareri ba khabane ba buang.” Hoo ho a babatseha. “Ke bala Bibe le ea ka.” E sa le botle boo.

109 Empa na u kile ua fihla nqalong moo A phetlileng lesira, nqalo e khethehileng moo boiphihlelo bo khahlotseng pelō ea

hao; mono u tseba Paseka e se tšomo ea mofuta; mono u tseba Paseka e ne e se Santa Klause, palenyana e itseng ea mafosisa; moo u itsebela ka bo-uena, hore U a phela; 'me e re ka ha A phela, le uena u phela ke hona? Haeba u eso fumane boiphihlelo boo le ka mohla, ena ke nako e khabane ho fetisa, lefatšeng, ho lumella Molimo ho phetla lesira, hoseng hona. Jesu o a phela. O lokolohile, lefatšeng, hoseng hona. Ke Mopholosi oa hao kajeno; e ka ba Moahloli oa hao hosane.

¹¹⁰ Empa na ha eso fumane boiphihlelo boo? Haeba ho se joalo, na u ka phahamisa feela letsoho la hao, le ho re, “Molimo, nkhouhele. Joale ke a lumela”? [Sekheo lebanteng—Mohl.] . . . motho ea morao mane, ka letsoho la hae. Molimo a u hlohonolofatse, monghali, ka mane. Motho e mong a phahamise matsoho a hae.

¹¹¹ Bohle ka mona joale, ba esong ho fumane boiphihlelo boo, na u ka phahamisa letsoho la hao, ho re, “Molimo, hoseng hona, ka mokhoa oa Hao o Khethehileng. . . Ha ke U kōpe kapa ho U bolella kamoo U tšoanelang ho mpha bona, Morena. Empa, ka mokhoa oa Hao o Khethehileng, Morena, na U ka nkisa nqalong moo ntho e tlang ho etsahala pelōng ea ka? Ke thulane le meepa le metheo ea ka, likahare tsa ka le likantle tsa ka, 'me ha ke khone feela ho tsitsa, ka mokhoa o itseng. Empa lumella ena ho ba Paseka ea mannete ho 'na. Nkise nqalong eo, Morena, motšeo ho lehoatata. Pelō ea ka e boptjoe mono, hona joale. Le ho mpha mahlabathe a khethileng ao ho ema holim'a ona, moo ho seng ledemona, kapa le letho le sele, kapa mang ho mpoella letho, ke a tseba ke bonnete. Ntumelle ho sheba ka nqane ho lesira la nako, hosasa. Ke tlela lebaka leo mona, hoseng hona, Morena, ho fumana hoo. Ke utloile moreri a leka ho e hlalosa. Ke batla U ntšeno lele eona.”

¹¹² Na u ka phahamisa letsoho la hao? Molimo a u hlohonolofatse, leleiti. Molimo a u hlohonolofatse, le uena morao mane, mohlankana. 'Me Molimo a be le uena. Ho le letšehali la ka mona, mola oa litulo ka ho le letšehali. Ho la ka le letšehali, na e mong a ka re, “Molimo, nkhouhele, hona joale feela.” Molimo a u hlohonolofatse, ka mona moleng o mong oa litulo. E. Phahamisa letsoho la hao, ho re, “Molimo, nkhouhele.” Molimo a u hlohonolofatse, leleiti le lecha.

Ke bolutu ke tepeletse, ke batla ho bona Jesu,
Ke utloe mololi-monate oa tleloko ea kou;
O tla khantša tsela o time litšabo tsohle tsa ka;
Morena, nke ke bohe mose ho lesira la nako.

¹¹³ “Nke ke bohe feela nakoana feela, ho bona Jesu tshong ea Hae.” Ho ka ba le e mong pele ho thapelo e koalang joale? Tšepahala feela. Phahamisa letsoho la hao. “Ha ke na boitsebelo ba kolobetso ea Moea o Halalelang, Moena Branham.” Ke sona seo ke buang ka sona. Ke ona feela mokhoa oa ho ba majalefa a

tšepiso, ke ka—ke ka kolobetso ea Moea o Halalelang. Le tseba seo. Ke tsoalo ea hao. Ke lehlabathe la hao le khethehileng. Molimo a u hlohonolofatse, leleiti. Molimo a u hlohonolofatse morao mono, mora. Molimo a u hlohonolofatse, monghali. Molimo a u hlohonolofatse, leleiti. Molimo a u hlohonolofatse ka morao. Ke hantle. Molimo a u hlohomolofatse, mohlomophehi. Molimo a u hlohonolofatse, mothaka e mocha.

Morena, nke ke bohe mose ho lesira la nako.

Ke bohe mose ho lesira la tšoabo le tšabo,
Ke utloe mololi-monate oa tleloko ea kou;
O tla khantša tsela o time litšabo tsohle tsa ka;
Morena, nke ke bohe mose ho lesira la nako.

¹¹⁴ [Moena Branham o qala a binela *Mose Ho Lesira La Nako* ka marameng—Mohl.] Haeba u eme nqalong eo, ha u tsebe feela moo u leng teng! Ho phahame matsoho a leshome kapa a leshome le metso e mehlang. Ke utloa a mang a sa le teng. Hoseng hona ha Paseka, hobane'ng u sa phahamise letsoho la hao ho re, "Morena, ke 'na enoa. 'Me ha letša leo le buloa ka hora ea leshome le motso o mong, ke tla be ke kene hantle metsing ao, le 'na. Ke theoaha ho kolobetsoa, ke tle ke tsoetsoe Bopheleng bo bocha, ho tsamaea le Uena, Morena. Ke batla ho boha mose ho lesira la nako. Ke batla ho fumana boiphihlelo hona joale, hoseng hona ha Paseka, ke tle ke khone ho re, mehlang efe bophelong, 'E, ke ne ke lutse ka tabernakeleng ea khale ea boloko, hoseng ho hong ha Paseka e monate. Molimo oa phetla lesira. Ka boha mose oane. Ka bona kereke ea ka e sa bolele hakaalo. Ka bona ho se letho lefatšeng le ileng la hlola le bolele letho ho 'na. Mono ka rekisa ka sohle seo ke se ruileng. Ka reka Perela ea theko e thata. Ka amohela Jesu joaloka Mopholosi oa ka.' Joale ke phahamisa letsoho la ka, Morena Molimo. Nkhauhele. Molimo, ke batla ho sheba mose ho lesira la nako." Na e mong a ka ba teng pele ho koaloa hona joale feela?

¹¹⁵ Molimo o ratehang, ona ke motsotso o mahlonoko. Re ntse re thabela mahlohonolo. Re ile ra thabela Lentsoe. Re le thabetse ho feta kamoo re ka hlaosang; Boteng ba Moea o Halalelang, Ea re fileng tiisetso e khōlō ena, ho thoe re tlohile, 'me re tlohile—tlohile lefung ho kena Bophelong. 'Me ba teng mona joale, Morena, bongata ba bona, ba phahamisitse matsoho a bona. Ona ke motsotso o mahlonoko.

¹¹⁶ Mohlomong ba koetlisitsoe sekolong se itseng sa borapeli. Mohlomong ba hotelitse likandelare. Mohlomong ba thothokisitse lithapelo, holim'a lifaha. Mohlomong ba ingolisitse bolumeling ba mofuta; ba qoelisitse ka mokhoa o itseng, ba tšelo ka metsi hloohong, kapa ho fafatsoa. Mohlomong ba thothokisitse Tumelo ea Baapostola ba phethisa meetlo oa tloaelo. Empa ha ba eso fihle lehlatheng le khethehileng leo, ha ba eso fihle nqalong eo joaloka Jobo, joaloka Moshe, joaloka

Abrahama, joalokaha bana bohle ha ba Hao ba entse. Ha ba eso fihle nqalong eo joaloka barutuoa bao ba ileng lebitleng, hoseng hoo, 'me ba Mo fumana a le sieo.

117 Abela, Morena, hona joale feela, bao ba phahamisitseng matsoho a bona, hore Moea o Halalelang o moholo o kene lipelōng tsa bona le ho phethisa mosebetsi o moholo ona oo re o kōpang hona joale feela. Re utloe, Morena. Ke ba Hao. Ke litholoana tsa Molaetsa. Ke U rapela ho ba hlohonolofatsa, ka ho babatseha. Ba fe kolobetso ea Moea o Halalelang, kajeno.

118 'Me ha re tsebe, re ka tšoha re sa bone Paseka e 'ngoe. Ntle le pelaelo ba teng ka mona ba sa tl' o khona; e seng Paseka e tšoanang le ena, Paseka ea sehopotso. Empa, Morena, ba bone Paseka ea mannete, eona eo, Morena, moo 'mele oa bona o tlang ho boptjoa ka sebopheho sa mohlankana kapa mosali, hape, ho tsoa lebitleng, ho phela kamehla.

119 Ba hlohonolofatse, Morena. Ke ba Hao. Ke Uena Ea ba hutseng. Hobane ho ngoliloe ho thoe, "Ha ho ea ka tlang ho 'Na, a sa huloe ke Ntate oa Ka pele." Joale ke ba Hao, haeba U ba hutse. Haeba U le haufi le bona, ho hulela matsoho a bona sebakeng, U haufi ho lekana ho phethisa mosebetsi o setseng. Ke ba Hao, Ntate. Etsa hore nako ena e be ea khotso ho bona.

120 Re U leboha ka ba neng ba etse qeto ea bona khale koana, 'me ba latsoitse bophelo bo bocha, ba ema mahlabatheng a khethileng. Re mona hoseng hona ho thaba le bona, litšepeng tsa ho Khutla ha Morena Jesu, mofa le rōna re tla—re tla kenela setsoalle le Eena, tshong ea Hae, joaloka ha re kile ra nosoa matšoenyehong a Hae. Aba sena, Morena. Moea oa Hae o re tataise le ho re supisa tsela, leetong la rōna.

121 Re fe tšebeletso e khōlō, joale, ka mashome a mararō ka morao ho robong, Morena. Le ho folisa bakuli le ba mahlomoleng ka potlako.

122 Bao ba esong ho qoelisoe le joale, ba tle lebitleng hoseng hona, ho theoha, le ho tsoha hape lebitleng la metsi mona, Morena, e leng taba e laetsoeng ke Morena oa rōna. Ka morao ho tsoho ea Hae o Ipontšitse 'me a re, "E-eang ka lefatše lohle, le bolele Evangeli. Ea lumelang a kolobetsoa o tla bolokeha." Abela, Morena, 'me ho tla ba joalo.

123 Re fe bosiu bo boholo, bosiu bona. Etsa, Ntate, re fe letsatsi le leholo. Re natefeloe ke Boteng ba Molimo halelele. Hobane re e kōpa ka Lebitso la Jesu. Amen.

124 Ntho e teng feela ka sefela seo sa khale, se etsa se seng ho 'na! Ha lefifi le nyametse, ho etsahetse 'ng? Leseli. Ha re se bineng joale, tlotlisong ea Molimo. E mong le e mong, 'moho joale.

Oh, re tla tsamaea Leseling, ke Leseli le letle,
 Le chaba moo phoka ea mohau e elileng;
 Re chabele, letšehare le bosiu,
 Jesu, Leseli la lefatše.

¹²⁵ Mohla A neng a hlaha hoseng ha Paseka, O phahlile lefifi lohle; la baleha feela. Joale O eme joaloka Leseli. “Ke ’Na tsoho le Bophelo, tsoho le Bophelo, tsoho le tse ka morao ho mona.” Tsohle ho bohle li ka ho Èèna.

¹²⁶ Ha le Mo rate na? [Phutheho e re, “Amen.”—Mohl.] Ba Mo ratang ba ba kae? Phahamisetsang matsoho a lōna, holimō haholo. Ke botle.

¹²⁷ Joale tsukutlana le moahisane ea lutseng pel’a hao ka matsoho, re sa bina hape. “Re tla . . .” Ho le letona, ho le letšehali, ka morao, ka pele. “. . . Leseli le letle.” [Moena Branham o tloha maekrofonong oa sefala—Mohl.]

¹²⁸ Tšebeletso e tla latèla, joale, ka mashome a mararō ka morao ho robong, ’me ho tla ba le tšebeletso ea therō, ho rapella bakuli. Tšebeletso ea kolobetso e tla qala ka hora ea leshome le motso o mong. Bohle ba batlang ho kolobetsoa, ka ho qoelisoa; letša le tletse. Ke tla tla le liaparo tsa ka. Re tla be re khutlile nakoaneng feela.

¹²⁹ Hape, bosiu ng bona, ho na le tšebeletso e ’ngoe, e tla latèla, mola oa pholiso, Molaetsa, le mola oa pholiso. ’Me re tla bona . . . Be, bosiu bona ke bosiu ba selallo tabernakeleng, hape. Re tla bona; lenaneo la rōna le maphathe haholo, re tla lōkela ho potlaka joale. E-eang libakeng sa lōna tse hlophisitsoeng, le je borakefese, le khutle, le ntse le nyakaletse.

¹³⁰ Re sa ema joale re bina, “O a phela, O a phela, Krete Jesu o a phela kajeno.” Ho lōkile, Moena Neville, na u ka tla koano.

O a phela, O a phela, Krete Jesu o a phela
 kajeno!
 O a tsamaea o qoqa le ’na tseleng e tšesane ea
 bophelo.
 O a phela, O a phela, ho nehela pholoso!
 Mpotse ke Mo tseba a phela joang? O phela
 pelōng ea ka.

¹³¹ Joale, e mong le e mong, haholo “Alleluia!” [Moena Branham le phutheho ba re, “Alleluia!”—Mohl.]

O a phela, O a phela, Krete Jesu o a phela
 kajeno!
 O a tsamaea o qoqa le ’na tseleng e tšesane ea
 bophelo.
 O a phela, O a phela, ho nehela pholoso!
 Mpotse ke Mo tseba a phela joang? O phela
 pelōng ea ka.

¹³² Ha re bineng hape. E tle re ha re fihla mono, “O a phela, O a phela,” re Mo phahamise matsoho a rōna, *joalo*. “O a phela. O a phela. Mpotse kamoo ke Mo tsebang a phela? O phela pelōng ea ka.” E mong le e mong joale.


O a phela, O a phela, Kreste Jesu o a phela kajeno!

O a tsamaea, O qoqa le 'na tseleng e tšesane ea bophelo.

[Moena Branham o buisana le motho e mong—Mohl.]

Mpotse ke Mo tseba a phela joang? (Ho lōkile, joale.) O phela pelōng ea ka.

¹³³ Na ha A babatsehe? Nakoana e khethehileng ena, e mahlonoko joale, moo re qhalanang, ho ea malapeng a rōna ho ja borakefese ba rōna. Le khutle hape, le ntse le nyakaletse.

¹³⁴ Ke tla kōpa, re sa inamisa lihlooho tsa rōna, haeba Moena Foulst oa rōna ea ratehang mona, ea tsoang Canada, haeba a ka re ntša ka polelo ea thapelo. Moena Foulst, ka kōpo hle. 

KE A TSEBA MOLOPOLLI OA KA O A PHELA SST58-0406s
(I Know My Redeemer Liveth)

Molaetsa ona ka Moena William Marrion Branham, o reriloe sethathong ka Senyesemane, o reriloe Sontaha Paseka ha letsatsi le chaba hoseng, 'Mesa 6, 1958, Branham Tabernakele, Jeffersonville, Indiana, U.S.A., o ntshitswe kgatisong ya teipi ya makenete mme o ngotswe o sa kgaolwa ka Senyesemane. Petolelo ena ya Sesotho sa Borwa e ngotswe mme e abjwa ke ba Voice Of God Recordings.

SOUTH SOTHO

©2019 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Krete. Buka ena e ke ke ea rekisoa, ea boela ea hlahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fua boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org